



INHOUD:

BLZ	TITEL
BLZ 02	2014 't waor m'ch 't jäärke wel
BLZ 03 - 04	Vaan Mathijs tot Clara
BLZ 05 - 06	Trökkieke
BLZ 07	Zoondagmörge
BLZ 08 – 09	Sport bedriev is gezond mer erg vermeujend.....
BLZ 10	Ierste Mestreechse ABC
BLZ 11 – 12	Korrek sjriev en beneume.
BLZ 13 – 14	Vajerkesdaag
BLZ 15 – 16	“E loot oet de loterij!”
BLZ 17 - 18	Heuvelveerdaagse
BLZ 19 – 20	‘n Dochter vaan ...viefteg.
BLZ 21	October Mariamaond.
BLZ 22	Vastelaovend 2015/16
BLZ 23 – 24	‘ne Boum Opzètte..



2014 't waor m'ch 't jäärke wel

De 'crisis' beheersde eus leve
 Mèt sjattinge zaote ze ummer deneve
 lers woorte veer bang gemaak
 Mèt oetgeve woord gauw gestaak
 Salarisse bevrore, zoe wie dat hèt
 Wat v'r hadde, dao doge veer 't mèt
 Ederein klaogde stein en bein
 Wie kriege veer nog e centsje bijein?
 Veer lierde weer minnesjere
 En hoofde dus neet te krepere.
 Gein twie oto's op de oprit mer eine
 En soms zelfs hielemaal geine.
 Of dat dingk dèkser laote stoon
 En mèt de fiets nao 't werk goon.
 Neet ederen daag vleis op d'ne teleur
 't Gezin inclusief hoond en kat goon deveur.
 De verwerming e gräödsje minder gezat
 Op 't resultaat vaan dat alles goon veer prat.
 En terech! Weer files in de winkel aon de kassa
 D'r weure weer centekes oetgegeve door de massa
 Waor 't noe ech 't aofgelaope jaor allemaal zoe erg?
 Veer loerde de tegenop wie 'ne berg.
 't Is bès te doen , leve mèt minder
 't Bezörg d'ch allein get mie hinder.
 Vaan 'ne 2cv nao 'ne Mercedes goon
 Is get boe veer allemaal veur goon
 En weer trök nao 't begin, d'n 2 cheveaux
 En in 't ergste geval nao de velo,
 Is gebleke dat veer dat ouch kinne
 Zjus wie neet ederen daag goon pinne.



2014: e jaor dat us trök op de rails heet gezat en aon 't dinke
 Veer moosde 't allemaal eve laote bezinke
 Rampe ,oorloge, de minsheid bleef 't neet bespaord
 Ouch woort neet trökgedeins veur weer 'ne maord.
 Helwèrkende lui aon de kant gezat en z'ch sjaggernere
 Umdat door HUN oontslaag HUN bedrijf kós doorfunctionere.

2015: Laote veer compassie blieve toene mèt luikes in d'n vreemde
 Mèt kraanke ,gehandycapte die 't éch minder hóbbe en oontheemde.
 Veer blieve hope veur de luikes zonder werk
 Hun aon 't werk kriege maak Nederland weer sterk!!

Zaoleg nui Jaor en veural 'n gooj gezondheid
 Sjaggerneer uuch neet euver wat geer had
 Mer geneet mie vaan dat wat geer nog hób !!!
 Opajam



Vaan Mathijs tot Clara

Mathijs woent oppe Boschstraat
Vindt drinke en springe mer euverdaod
En oppe Vriethof Servee en Jaan
Ouch die kinne niks devaan.

En Slevrouw ,op eus
gezèllegste plein
Vindt hosse gaaroets neet
En Theunis vaan Padua
geworteld in Sjaan
Blijf t'n alle tije 'nen Italiaan


Treeske vaan Blauw Dörp
Hèlt ouch neet vaan dat
beer-geslörp
En in St Pieter mèt Pie en
Pouw
Doen ze allein mer ,
knuddel in de mouw”

Michèl oet Heugem kin neet
bevatte;
Heet niks mèt die
Waterratte.
Lambèr is vaan 't
Emmaplein verdreve
En moot same mèt Anna
weier door 't leve

Huub, dee zoot in 't
Bosserveld
Deit ouch neet mèt ; veur
gein geld
Jozep oet Belfort en Martin
Wieck
Springe liever op kèrkmeziek.

Boerum goon zie neet in 'nen rijjaloet ?
En mèt z'n allemaole 'ns lekker drop oet.
Door Mestreech en boetewieke, allemaol achterein
In 'ne Rijaloet wie 'ne boemeltrein

Mijters, kalòtsje ,kap of gewoen, 'ne kale kop
Clara mèt de weurs onder d'n erm väärop
Wat kin daan nog gebäöre ...??
Dat Nelis oet Hare, Salvator oet Belfort en
Walburga oet Amie ziech ouch laope te besjäre !



fijn

in



Monnie en Gonnie zien e paar apaart
Kinne z'ch eve neet inhawwe en renne in volle vaart
Petrus oet Hier hêlt alles in han
En lègk mèt plezeer 't sjaggernere eve aon Ban

En is dat daan allemaol veurbij, laope de kèrke(hopelek) weer vol
Veur 't serieuze werk nao al die daog oet de bol.....
Op Asselegoonsdag geit de mins ziech bezinne
En nao 't kruiske aon de Vastentied beginne.
En es Clara veur good weer heet gezörg
Weurt bij häör 'ne bougie bezörg..!!

Eus stadspatroen, Sint Servaos, beloerde dat alles vaanoet de tories, hoeg bove zien
Mestreech
En zaog dat 't good waor
En Grameer sloog elf sleeg.....

OpaJam



Trökkieke..



Trökkieke is neet good. Teminste dat zeet me. Trökkieke is neet ALTIED good ! Veural es 't um vervelende zaken geit die 'ne mins in zien leve moot mètmake. Mer soms is trökkieke - veural mèt d'n ouge touw- 'n geweldige ervaring.. Aofgeloupe week, op 'n kawwe winteraovend, gónge mien gedachte trök in d'n tied. Sjoen meziekseke dwarrelde door de hoeskamer. Nog eve 'ne blok hout in de heerlek brannende heerd gedoon. Dröpke binne handbereik. De

tillevisie op zwart.

Mien kleindochter had zjus gebeld. "Wie geit 't ampa?" waar de ierste vraog die ze zier geïnteresseerd stelde. Viefteen is ze alweer."Good, keend en mèt diech?". Vraoge boemèt e tillefoon-gesprek euver 't algemeen altied begint.

Onderwijl ze vertelde euver sjaol, häör vriendinnekes en häör ierste galabal hoort iech 'en passant' häör ouch zègke dat 'n spaak vaan 't achterraad vaan häöre fiets kepot waar. En daan beejste netuurlek es ampa direk d'n technische kinnes aon um dat te ripperere. "Nein , nein ampa ,dat hoof neet direk. Iech höb gein las devaan", kloont 't door d'n tillefoon.(door d'n HOORN kin allewijl neet mie). Geer zeet te aajd en moot röste!" Sjevraoje, hinnevel euver mien gans lief.... Zoe bezörg !

Nog neet zoe hiel lang geleie zaot ampa neve häör bèd. Zjus wie iech dat bij mien eige dochters doog . Mer daan es Pa . Noe al weer zoen 45 jaor geleie. Same mèt häör jonger breurke luusterde ze nao door miech gefanta-seerde verhälselfkes euver evermenneke Prikkebeen. Dee dook in mien verhaole euveral op. In d'n trein, in de supermert, op de speelplaots vaan sjaol of onder wandeling in 't bos. Verzin 't mer, 't menneke waar neet weg te branne.

Onder 't vertèlle vroeg iech wel 'ns get euver dat wat iech zjus verteld had. Es iech dao de gooj antwoorde op kreeg wis iech dat ze mèt volle aondach de belevnisse vaan Prikkebeen volgde.

Mer ouch iech woort 'getés'.

"Ampa, wie kaom Prikkebeen ouch weer op de speelplaots terech?"vroog häör breurke 'ns, onderwijl iech ein vaan mien 'literaire hoegstendsjes' vertelde.

"Dat vertelde iech toch zjus " zag iech versjrik. Iech wis verdomp neet mie wat iech gezag had.! . "Te voot, zjus wie de aander kinder!",perbeerde iech.

Oh, nein "zag heer,"geer zag toch dat heer in de fietsetas vaan juffrouw Mieke had gezete en häör boteramme had opgegete onderweeg"..... Es vollierde verteller dee z'nen eige teks vergete waar en dao niks vaan wouw laote merke vroeg iech weer ;



“Wat wouste dao vaan wete jong?” ”Nouw ampa, wat zaot op die boteramme? Ete evermennekes ouch pindakies?” Umdat iech ouch neet mie good wis of iech oets vertèld had dat evermennekes dat neet lösde, loerde iech op m’n horloge, gaof aon dat ’t tied waor um te goon slaope en dat ampa de volgende kier dao op trök zouw koume.....Oontsnap.... Ze nog eve oonder de dèkbèdde verstoompele. “Gooje nach en slaop lekker” touwfluustere en ampa verleet op zien tiene laopend stèllekes de slaopkamer.....

Dao-op trökkieke is absoluut gein straf, kin iech uuch vertèlle.

Wat ‘ne prachtige onvergeteleke tied. Iech droonk mien ‘niesteke’ wawwelwater leeg, loerde op m’n horloge en zaog en veulde dat ’t tied woort um ouch te goon slaope en doog ’t “trökkiekbook” touw. Evels veur dit momint.

‘t Hout in d’n heerd waor oondertösse opgebrand en ampa ouch....

“Slaop lekker kinder”, mómpelde iech nog in m’ch zellevers en trok ‘t dèkbèd euver mienen ‘awwe kop’.....”Aote die evermennekes noe wel of geine pindakies...?”

OPAJAM



ZOONDAGMÖRGE

Pa en dochter in trainingspak
Pa liekend op 'ne goodgevölde
eerappelezak.
Same goon ze trimme in 't bos.
De dochter heet de spiere al los
Ze zal good op Pa mote lètte
Heer wèlt alles op alles goon zètte !

De dochter späört häöm aon
Pa zuut steerkes en soms evels de maon.
Vaan ophawwe wèlt heer neet wete,
Pa is eve ziene leeftied vergete.
De modder vluig häöm um zien oere en
stekke,
Es heer zien twiede röndsje begint te
trekke.

Mèt 'ne kop zoe roed wie 'n kroot
Vraag heer ziech aof , of dat noe wel moot
!
Laanksem begós 't tot häöm door te dringe
Tot'ste neet zoe meu weurs este in e koer

geis zinge.

Bij die gedachte zoonk Pa haos in de grond.
Meh achteraoef bleek 't wel zoe gezond.
Och wat is 't toch meulek in 't leve
Aon d'ne echte leeftied touw te geve.....



Sport bedriev is gezond mer erg vermeujend.....



Zoondagmörge. 't Is tien oor . De helloupers stoon te trappele aon de start in Amsterdam. Klaor veur de marathon. Twie oor en nog get minute later geit d'n ierste euver de eindstriep die 42 km en 150 meter ieder, de startstriep waar. Toen nog fit en moonter noe oetgeblus en oetgetèld. Handdeuk weure euver de sjouwers vaan de broedmagere gefinishte athlete gegoejd. Ze blieve dao-op haange door de oetstekende mager botte op diezelfde sjouwers. Fleske water aon de moonde, eve zwejje nao de fotografe, blomme in de hand vaan familie en organisatie en of vrun en dat waor 't daan. Sommege duie op 't knupke vaan de stopwatch en daan wete ze zeker dat ze 't gehaold höbbe en ze kinne stoppe. Dat tingk hèt neet veur niks STOPwatch.....

In Paries stoon 'raad'renners aon de start. Vaan hun weurt verwach dat ze nao Roubaix goon. Op de fiets , dat wel.

Waore de luipeers in Amsterdam mèt zoen twelfdoezend in Paries stoonte hoegoet twiehoonderd maan aon de start. Lepe ze in Amsterdam euver sjiek en sjoen gekeerde en geasfalteerde weeg riechting finsh, in Paries waore kasseie de vloerbedekking boe-euver de renners hunne weg zeukde en boe daodoor de eeltvörming op bepaolde liechaamsdeile mèt centimeters tegeliek touwnaom.....Neet nao twie ore loupe bereikde zie de eindstriep mer nao zes oor keihel pedalere. En daan mooste um te winne ouch nog zörge datste geine veur d'ch dölds anders höbste veur niks d'ch oet de slöffe gewèrk. Nouw jeh, veur niks deisten 't es renner noe ouch weer neet.... Nao aankoms weurt de winnaar everspeuld door fotografe en tillevisiecommentatore die allemaol wèlle wete wie heer dat gelap heet.. Zjus of heer/zie neet nao de beelde had geloerd. Hijgend wie e renpeerd dat zjus ziene rögkberijer aon de finsh had afgelieverd gief heer – dee raadrenner dus – teks en



oetlègk. en liet tössedoor e slökske water nao binne glije.

Natuurlek höb iech deep respek veur die

sportende luike. Ze kriegen 't neet veur niks Maonde en este de beroop daovaan maaks evels jaore laank traine en nog 'ns traine bringe d'ch hopelek get hoeger op de prestatieledder. Hopelek, want neet ederein haolt d'n tóp . Bij de luipeers manifesteert z'ch dat miestal door blessures umdat de lief neet kin volge wat de geis zoe gere welt. Bij de'raad'renners biste gedoemp um mèt bidons gevöld mèt water of aander vloeistoffe onder de truike opgeslage, vaan de ploogleierswage nao de 'baas' vaan de ploog te fietse en d'n collega's die 't beter höbbe getroffen estiech, de knech. Este daan es'knech' aon de finishlijn vaan d'ne fiets aofrolts, interesseert niemes. z'ch veur d'ch. De winnaar dee tèt! Daorum wèlt ouch ederein dát zoe gere zien. Ierste. De hiërarchie in de sport kint gein genade.



Zoondagmörge .’t Is haaf tien Boete steit ’t zönneke al hoeg aon d’n hiemel. Iech sjöt m’ch nog ’n tas koffie in en loup d’n hoof in. Genetend vaan de koffie en ’t zönneke constateer iech dat de pas geplante plentsjes nudeg water mote höbbe. Nao de leste slók koffie vól iech de spruit en laot de plentsjes mèt genete. Daan nao binne um te goon genete vaan sjoene sport. Iech placeer m’ch veur d’n tillevisie en laot alles op m’ch inwèrke.

De helluipers doen hun bès. Ore en ore naodat d’n ierste euver de finsh is geloupe koume de recreante nog binne. Stikkepot. Väöle waore gerope mer wienege volbringen ’t . Hun beloening: Traone mèt tuute. De raadrenners die ’t wel gehaold höbbe mer néét es ierste, verdwijne zonder geluid onder de douche. ’t Eineste wat ze laote hure is ’t gehijg vaan vermeudheid en spetterend water.....Zinge lök neet mie.

Es mörge ’t zönneke weer sijnt gaon iech wijer mèt ’t genete.... vaan m’ne pensioentied. HEEEEERLEK. Niks hoof mie en bijnao alles maag!! B.v. ’n wandeling make! Bitsje meu wèl iech nog wel weure.....!!

Opajam



Ierste Mestreechse A.B.C.

- A** = Awmemme, wee deit dat neet geer?
- B** = Bamboezjere vaan de Mestreechteneer.
- C** = Cavalkade, veer zègde kavvelkaad.
- D** = Nèt den Daanjel, zie waar mistal zaat!
- E** = zien egaars, die nump me in ach,
- F** = dat zien fratse boe me um lach,
- G** = unne gawdeef, dee steult wie 'n rat
- H** = huurt bij meitskes die loupe op 't Bat!
- I** = den ingel op den torie vaan't stadhoes
- J** = 'n jenkpluim, die huurt hijj neet thoes.
- K** = de kenkee dee brandt op petrol
- L** = is 't lirejom, en daan bis'te vòl.
- M** = dat is môeljaan, dee hèlt neet ziene moond
- N** = is e nuij'ke, dat geit miestal roond.
- O** = unnen oonnöt en dat is hiel sjus
- P** = is de Piele, dee blijf'toch vaan us
- Q** = quadrille, dat is unnen dàns
- R** = dat is rebzjie, geef hún geine kàns.
- S** = is 'n sjeermoul, dat smaak lang neet gek
- T** = e tartepömpke veur de lekker-bek.
- U** = de uujer dee hink oonder de kooj
- V** = dat waar Vluu-Bet en dàt waar 'n gooj.
- W** = 't Welke, zoonder buim kaal en leeg
- X** = dat is niks, kump neet veur in Mestreech,
- LJ** = dat is ouch zoe en deit gaar neet mèt
- Z** = unne zjartel, dee zit aon e korset en is ouch 'n zej-baor, sjus wie euze kop en daorum hèlt den A.B.C. nao mèr op !!!



Korrek sjriev en beneume.

Iech höb 't al 'ns ieder gesjreve; Die verëkde (excuis) Ingelse benaominge die aon eus prachteg dialek zoemér weure touwgevoog.

Niemes vraog drum, inins zien ze d'r.

Noe kin iech m'ch veurstèlle dat boetelenders of ze noe student zien, hei wèrke of es toeris door de stad loupe eus dialek mer oonverstaanbaar en oonleesbaar vinde. De zuus wel 'ns hei of dao e probeersel um dialeknaome inclusief de zjuste oetspraak door dee bevolkings-groep te laote leze of sjriev. Liekend nörgens op! Alle Dictionairs, dialekbeuk en websites tén spiet. Dus.....de oplossing, daan mer 'n Ingelse benaoming veur dat woord of onderwerp zien te vinde.

B.v. Hadde v'r twie jaor geleie nog Keuninginnendaag woort dat al gauw Queensday. Dink noe mer neet dat es 't ECHTE Queensday is in Ingeland dat ouch mer eine Ingelender 't in z'ne kop haolt om miech es lieger opgeleide oet te lègke dat ze dao-mèt Keuninginnendaag bedoele. Want zie höbben 'n Queen.

Noe höbbe v'r 'ne Keuning en viere veer Keuningedaag op ziene verjaordag zouwste meine. Iech in eder geval! Mer.... dao kump 't; KINGSDAY !!! mote v'r viere ! Kingsday!. Es of ze op deen daag rölkes peper-munt goon oetdeile....inplaats vaan



fies viere mèt Oranje-bitter es beginnend drenkske. Wie daan ouch. 't Zal bij miech wel aon d'n awwer ligke Allebonneur veur bove de Moerdiek; dao is 't ech Koningsdag!

Iech zouw 't haos vergete. Wie is dat meugelek? Nog perficia mèt de beneuming vaan Mevr.Penn ter Strake es leidinggevende aon de gemeinteraod, de pelitie en brandweer en astrein nog get ierebäöntsjes es besjermvrouwe vaan diverse vereininge. Eindelek 'n echte vrouw. Waor Albert in zien functie; Besjermmaan???

Gein idee. Um taolkundeg vaan in de war te rake.....

Boerum sjrief iech neet de naam vaan de functie vaan Mevr. Penn?

Gaon iech uuch oetlègke. Sumpel. Iech weet neet wie iech dat moot sjriev! Sjrijfste noe; börgemeisteres(in) ? 'n Vrouwelijke arts numpste toch ouch neet dokteres(in).. Nogmaols; IECH neet. Iech zègk gewoen dokter, vertèl m'n maankemintsjes, gaon nao d'n apthieker en daan nao hoes. Mer 't geslach vaan de börger touwvoge aon häör functiecq aanspreektitel ? Meujlek.

Is ze daan soms; Börgermoojer ? Omdat de stad nog noets 'n hospes gehad heet kump dat bij miech hiel oonweneg euver. Börgermoojer ? Dat zal ze zeker weure mer um 't zoe te beneume..... In alle beuk die euver 't dialek goon en boevaan iech 'rs inkele in mien bezit höb, steit niks euver de titel vaan 'n vrouw die die functie bekleid of bekleid heet. H i e l e m a o l niks! 't Is m'ch neet 'n opgaof zègk um in Mestreech moojer te zien.... vaan zoeväöl dialeksprekende kinder. Hun moojertaol.




Gaank die mer 'ns oetlègke in 't ABN watste vaan hun verlangks. Veer kinne häör wel verstoon mer kin zie eus antwoorde wel verstoon en leze zonder tolk?

Wie daan ouch, eve 'ne tip.

Mevrouw ter Strake gaot nao de site www.Mestreechertaol.nl. DE site veur ederein dee z'ch 't prachteg Mestreechter dialek welt eige make. Vaan zoer vleis tot väärsjinkel en vaan rommedou tot z'ch ziene kies neet vaan 't broed laote oontnumme! 't Steit allemaol drop.

Iech wach noe al mèt spanning op de machseuverdrach mèt Vastelaoven in 2016! En op alles wat dao tösse ligk. Dat lèste is nog belaankrieker.



Hiel vääöl succes Mevr. De börgem...es...in ...moojer.

Kump zeker good . Veer zien noe al blij mèt uuch! Iech zouw m'ch moojer neume es iech uuch waor. Höb geer euver 'n paar weke 'ne gigantische Moojerekesdaag!

Opjam.



VAJERKESDAAG!

Aofgeloupe zaoterdag höb iech mèt mie daan gewoene aondach de bijlaoge geleze die zaoterdags es touwgif weurt bezörg bij de gezèt. M'n aondach góng oet nao twie verslage dao-in.

Ein artikel betrof twie verslaaggeefsters die ach daog verspreid euver drei weke hadde 'mètgeloupe' op de - in mien ouge – mies zörgvraogende aofdeiling vaan e verpleeghoes. Veur verplegers hel – en leefdevol werk bleek in dat artikel. Noe dink iech, mèt vajerkesdaag aonstaonde, iech trök aon Pa vaan us. Vaan us. Veur waore mèt zes kinder thoos . Vijf veur d'n oorlog en eine in d'n oorlog gebore. Ma is joonk gestorve....

In de tachtger jaore góng heer noedgedwonge um gezondheidsreie vaan zien toenmaolege vrouw nao e bejaordehoes. Zellevers waor heer nog zier actief. Zienen hoof en plentsjes in 't algemeen waor zienen hobby. Mer ouch boetsere (pas op he; NEET kleie) doog heer op neet oonverdeenselijke meneer. Heer zag altied es iech 'm had opgehaold en weer nao hoes brach; "Venaovend vloge de fruitsjaole en asbek weer de deur oet...." Zellevers dooch heer maonde euver e mooswief of de Mestreechter geis. 'n Door Pa gemaakte krib en crucifix zien in de familie nog altied te bewoondere. Ouch heet heer jaore laank es gewaardeerd veupedicure de veutsjes vaan zien leeftiedsgenote verzörg. Dit al bijein heet bij us es kinder deep respek aofgedwoonge. Ouch in de Lazarets in Mestreech tijdens d'n oorlog gewonde verzörg vaan alle nationaliteite. Oonderwijl thoeskoumend en zien kraanke vrouw verzörgde mèt steun vaan de Juliaantjes. Nonnen woenend aon de Zwingelepöt die zich besjikbaar stelde um in hoeshawwes gezinshölp te geve.

Boerum sjrijf iech dat noe op zalt geer uuch aofvraoge ? In dat artikel – iech citeer dat mèt alle respek riechting verplegende- stond te leze dat koosnöömpkes zoe es sjat, leveke e.z.w de aanspreekwäörd waore nao de luikes touw. Hiel begriepelik bij binnekoms op de kamer 's mörgens. en/of conversatie tijdens aander activiteite. Es iech bij Pa op fiziet waor in 't – toen nog- bejaordehoes - en d'r kaom 'n verpleegster binne , leep op 'm aof, streek 'm door zien haor en vroeg; "En jong, lekker geslaope?", daan meinde iech of iech get kraog. En daan bedoel iech neet es viefteger, ouch 'nen aaj euver miene kop.....

Pa waor fris vaan geis en nog altied geïnteresseerd in 't wereldgebäöre, 85 jaor (91 gewore) en bijnao e leve achter de rögk mèt zorg veur de aander (gewaardeerd lid vaan 't Roed Kruus) en z'n gezin en noe aongesproke weure door 'n "snótneus" mèt ; "En jong.....!"

Dat waore mien neet oetgesproke gedachte. Heer en mèt häöm vööl aandere woorte en weure oetstekend verzörg. Zeker allewijl al de bezuineginge. 't Personeel löp z'ch de kuut oet um eder de häöm of häör touwkoumende zorg ederen daag weer te



geve. E vruntelek woord, fris gewasse – en wie – nao 't oontbijt en recreatiezaol es dat gewins weurt. Mer zoe wie Pa indertied de cliënte aanspreke klink neet erg respektvol ouch al ervaere de luikes dat mesjien neet zoe.

Nogmaols iech kin neet genóg mien respekt oetdrökke veur ederein dee dit werk neet allein deit **veur de cent mer es roping! Zeker op de aofdeiling boe dat artikel euver góng.**

't Aander artikel leet 'ne mins zien dee op awwere leeftied in de rechter hand e graasmasjien veuroet duide en in e linkerhand 'ne ondersteunende wandelstek had. Heer kós nao jaorelaank d'n hoof vaan e kastiel verzörg te höbbe 't neet laote...

Zellevers bin iech geine hoesmaan, mer dabbel gere in d'n hoof. Erfgood vaan Pa dink iech. Drei weke geleie vroeg Elly of iech de kamer wouw zuige. Neet zellevers mer behölp vaan de zuiger.

Iech snapde m'ch dat apparaat, pakde de kabel en mèt eine voet op de sjakeleer trok iech wie 'ne wèlle aon 't snoer. Es iech 't los leet vloog 't weer trök 't masjien in. Iech trek weer, noe wie twee wèlle en weer vluig 't snoer trök 't masjien in. Elly zuut dat en reup: "Hallo, dat is 'ne stofzuiger gei graasmasjien. Dui de stekker mer in 't stopkontak, daan kump vandaog mesjien nog get devaan....."



Mèt 't sjaomroed op de kake doog iech wat ze zag en begós iech aon mien opdrach.....Toch mer 'ns get mie in 't hoeshawwe goon doen!!

Umdat 't binnekort VAJERKESDAAG is höb iech Pa mèt 'n hooflètter gesjreve en neet allein daoveur!!

Opajam



“E loot oet de loterij!”

Veurege week waor ‘t ‘ weer ‘ raak.

“Proficiat met uw prijs. Zegt het voort . Nodig uw vrienden uit voor een feestje om dit samen met hun te viere!”.

Dat waor d’n teks in ‘ne brief dee m’ch door ‘n loterij woort touwgesjik.

Iech sjrók. Zouw ‘t daan eindelek goon gebäöre. Eindelek m’nen druumoto veur de deur kinne zètte. M’n kinder en kleinkinder get kinne touwstoete nao al die jaore vaan bezuineginge en beknibbele op mien oetgave. Zouw dat daan eindelek kinne?

Iech zaog d’n hoof al veur m’ch gevöld mèt vrun en familie. Tent, verseerd mèt gekleurde lempkes, buffèt,stoontaofels en e springkösse um de kleinste bezeg te hawwe zoedat ‘t fies tot in de kleinste eurkes doorgeviert kós weure. Beppie galmde door d’n hoof en naoventrint ; “Och wat is ‘t leve sjoen es de zon sijjnt...” Iech zaog m’ch zellevers bezeg mèt tillefeuntsjes aon te numme mèt aon d’n aandere kant de ‘goede doelen’. Iech gaon ze allemaol aofwieze bedach iech m’ch. Noe ‘ns eve aon m’ch zellevers dinke. En es get euver is zien veur wel weer wijer..

Egoïstisch ? Joa zeker ! Veur eine kier op zoen memorabel momint in de leve maag dat wel bedach iech m’ch zonder sjöldgeveul.....

Al jaore sponsor iech de veurege luikes die get gewonne hóbbe. Noets waor iech debij. Jao, vaan die klein prijskes tösse € 5 en € 7,50. Mer d’n teks in de brief veurspelde toch ech groet nuits.: “Proficiat mèt uw prijs. Nodig uw vrie.....” Vaan de consternatie euver alles wat iech miech nao die zin in miene kop had gehaold waor iech gestop mèt leze ... Iech had ‘m nog in mien han en laos wijer vaan dao boe iech gebleve waor. Door mien bubbelende hand veel de brief op de grond. Iech raapden ‘m op en laos de zin nog ‘ns.

“U bent de winnaar van € 7,50...” Dat kin neet woer zien. Zoen fillicitatie en daan mer zoen klein prijske. In 2015 boe daogeleks millioene en millioene weure oetgedeild aon prijze. Millarde en miljarde aon steun veur lender die neet zoe good mèt hun hoeshajdgeld zien um gegaange. En iech, iech dee ‘t zoe hel nudeg heet , weur vaan harte gefilliciteerd mèt de pries vaan €7,50 en oetgenudeg um dat mèt vrun en familie te viere..... Dao bij kump nog dat iech gein €7,50 gewonne hóbbe mer datzelfde bedraag verlore , noon de pie. E loot kos jammers € 15,00 . Wie dörve ze. Dit is de wereld op z’ne kop. Zoeget wie bij tennisse. Es de tegestend(s)er ‘ne bal mis krijg heer/zie ‘n staonde ovatie... Teminste zoe kump ‘t euver...

In miene arbeidzaome tied zaot in ‘t Keerspakkèt – jao zeker veur kraoge e Keerspakkèt – i ‘ne Kedo-bon vaan F 100 - . Veer hadde gein planne um dat jaor mèt vekantie te goon mer um dee bon te verzèlvere mooste veur wel. Dus bèste lezer(es) wat doge veer; veer gaove F 800-





oet um die 100 trök te kriege.....Wee waar hij de slumste. Allewijl krijgste in versjèllende winkels tegooj-bonne; Teks; Bij besteding van € 25 , € 5 retour. Daan hōbste de neiging um aon dat bedraag te koume nog get te koupe. Get watste gaaroets neet nudeg hōbs. Mer jeh, de wèls ouch dat retourbedraag neet misse. Nog zoe get: Twie artikele koupe daan is 't derde gratis. Boerum hōb iech dat derde veurege week nog mote betaole...???

Geer begrep, vraoge te euver. Meh jeh, 't is wel leuk winkele en de spanning aon 't ind vaan edere maond wèlle veer ouch neet misse.!

Dus op nao de volgende trèkking. De wèts 't jammers mer noets.....!



Heuvelland 4daagse

Donderdagmörge haaf zeve. Iech sjrik wakker. De wèkkerradio liet van ziech hure. Umdat in de slaopkamer neet ederein dao-op zit te wachte 'houw' iech 'm geliek mèt 'ne linkse directe oet en stap hiel stèllekes mien/eus bèd oet. Vendaog is de start van de Heuvelland 4-daagse. 'n Eurke later waor iech onderweeg riechting Berg en Terbliet. En iech neet allein zoe-es bleek op de weeg . Ouch bij aonkoms op de parkeerplaots waore regeleers al actief op de de al bijna vol parkeerwei de oto's e pläötske te gunne. Mèt 'ne vrunteleke gooje morge winsend oonderein begaof de meute wandeleers ziech riechting de start/finishplaots. 't Zouw 'nen werme daag weure vendaog. De flesse water bungelde in de koontteskes en in flessehawwers aon de zijkant van de rögzek. 't Rook nao zonnebrandolie en de köp waore bedèk mèt de mies vreempsoortege dèksele. De patsj had de euverhand netuurlek mer iech zaog ouch Chinese mötse, huudsjes mèt roontelum blomme, struuje huu, roej zakdeuk mèt veer knäöp drin gemaak um 'm op de kop te hawwe, samegevat een leuke collaasj. Jeh , de kleiaasj waor eve zoe gevarieerd.. Korte brook, dreikwaart brook, lang brook, sportbrook, zwumbrook en bermuda boe, bij de awwere drager, de boek vrijelek euver d'n èllastik hóng te bungele. De sjeun is e verhaol appaart. Van splinternui tot aofgetrampeld en alles wat zich dao tösse bevind. Hoeg sjeun, liege, gymsjeun, slippers (wee haolt dat in ziene kop...), sandale num mer op.



Wie daan ouch ederein góng , wie heibove besjreve, goodgemöts op weeg. Fris van binne mer hiel erg werm van boete. Es iech 'ne 'berg ' veur m'ch zaog opdoeme gösjde m'ch 't zweit al langs miene kop. En neet allein dao..... De organisatie had gezörg veur extra watertappunten ouch boete de rösplaatse boe daan ouch dankbaar gebruik van woort gemaak . Mer neet allein daovaan. Op de rösplaatse waor de vlaoj neet aon te sleipe. De Limburger mer veural de neet Limburger, kóste hun smaakpapèlle 'ns good op de proef stèlle. En dat doge ze dan ouch oetbundeg. Kaw mèlk en kaw karnemèlk waor boete de werme koffie, d'n draank debij. Had dat allemaol e pläötske gekrege in 't lief, góng de wandeling weer wijer.




De volgenden daag bleek dat Slivvenhier de roop um mie watertappunte e bitsje al te lètterlek had opgevat. Dat spöl veel mèt bek oet d'n hiemel. Regecapes en perrepluus in alle kleure en maote veranderde de groep wandeleers in 'n kleurrieke cortège dee ziech door 't veld en de bosse slingerde. Bergske op bergske aof. In de laop vaan de mörge klaorde 't weer weer op en verdwene de jeskes en regepakke weer in de daoveur bestumde teskes en rögzek. De buie hele op mer 't laope moosde doorgoon. De dao-op volgende twee daog waar veurtreflelek wandelweer. Ouch de róte die waore oetgezat waore schitterend. Sjoen oetziechte en langs bezeenswierdeghede die de meujte weerd waore um 'ns eve bij stèl te stoon

De lèsten daag had iech gezèlsjap vaan 'n mevrouw vaan 86 jaor. Jaozeker 86 jaor....lech had meujte um 't minske bij te hawwe. Klein vaan stök mer groet vaan pretatie en zoe moonter, zoe gemotiveerd en zoe gezèlleg. Rögzak op de rögk- dao zitte die dinger altied- zichzelf ondersteunend mèt 't euverbliefsel vaan 'ne perrepluu. Dee had ze gevoonde, 't dook de vanaof gedoon en hoppa, mevrouw had 'ne wandelstek.

De finish kaom in ziech mer ze wouw nog eve röste veur 't moment suprème. Iech kraog 'n stevege hand en winsde häör vääöl succes touw bij alles wat ze nog van plan waar, inclusief dalek de eindstrijp hole.

Ein dingk moos iech riechting häör nog kwiet; lech zag:

"Mevrouw, gegarandeerd, als u achter de geraniums gaat zitten, gaan de geraniums dood....." Häöre hartelege lach echode nog lang door 't Limburgse Heuvelland.....



'n Dochter vaan ...**viefteg**.

't Is m'ch get. Op d'n daag dat iech dit opsrijf weurt m'n twiede dochter viefteg jaor. Neet te geluive mer wel woer. Viefteg jaor. De ajdste bevindt z'ch al drei jaor in die fase vaan häör leve. Vemiddag goon veer 't häögeleke feit vaan de jongste viere. Same mèt familie en vrun, maan en hun kinder. Pèlske, wijtsje en lekker ete. Oongetwiefeld weurde ouch door versjèllende luikes die zellevers pas kort of langer of nog neet, dee prachtege leeftied höbbe bereik. op ludieke meneer häögenisse opgehaold. Middels veurdrachte en leedsjes zal häör leve de

reveu passere. Ouch iech voolt m'ch gerope in die rij pseudo-artieste aon te slete. Gere zelfs. De kas mèt dia's en fèlms weer 'ns ingedoke. 'n Stöbwolk kaom m'ch tegemoot. Zoe lang waor 't geleie dat iech d'n inhajd weer 'ns had bekeke. Iech hoofde nog zjus neet e lepke veur m'ne moond te doen. 't Oetzeuke en sortere kós beginne. De dia's kaome 't ierste aon de beurt. En dao mèt same ouch de häögenisse oet vreuger jaore. De dochter in de erm vaan ma, vaan ama, vaan ampa, vaan peter en meter, vaan de sókkertant en netuurlek vaan m'ch zellevers. De Cursus luier verzuvere zonder 't slachoffer häöre boek tot spaangekösse te make waor 't ierste boe iech m'ch aon moosde onderwerpe. Ouch 't opsnouve en verwèrke vaan de reuk dee d'n inhajd vaan dee luier verspreide en de kinderkamer vólde, huurde daobij. Naodat iech m'n kunswerk roontelum 't vötsje vaan mien dochter had aongebach en 't keende oplufde waor 't de bedoeling dat 't bleef zitte en neet via de spartelende beinekes op de grond veel. Nao ongeveer 'ne kier of tien bleef 't inderdaod zitte. 't Waor toen neet wie allewijl, pampers mèt pilotesleting, nein, ketojne luiers die op vernuftege meneer gevajd en gemonteerd moosde weure. 't Fleske geve nao 't werme daovaan, had iech gauw onder de kneej. Dat had zeker te make mèt 't feit dat iech same mèt 't prutske op miene sjoet, in slaop veel. Es Ma us wakker maakde góng 't keend euver de sjouwer um e buurke de kans te geve einege inhajd vaan 't fleske vaanoet häör määgske op m'n sjouwer te deponere.

Daan 't däöpsel, de ierste stepkes, de ierste wäördsjes. Ma hoopde op Mamma en Pa hoopde op Pappa. Mer door dat gelazer mèt die spaange vaan de luier kós iech 't al wel gauw vergete.... Daan de kleutersjaol, fietse liere- kepot me door achter 't fietske te renne, bang dat ze zouw valle- de lieger sjaol - awweraovende, de ierste H.kemunie en 't veurtgezèt onderwies. Dao-tössen in laog de ierste fase vaan de opvoding. Netjes praote, neet vervelend zien, nao bèd beteikende ouch, noa bèd, de fiziet e henneke geve, familie 'ne poen of zie dat noe fijn vondt of neet. Luikes mèt 'ne snor perbere te oontwieke. Es awwer hadde veer 't mer drök demèt. Snouf d'n neus oet, eet door, was d'n han, wat zuuste oet, is d'n hoeswerk klaar ezv ezv. En dat allemaol um 't keend weerbaor te make in de maotsjappij. Achteraof.... 'ne prachtege tied. D'n kinder zien opgreuje en 'n fetsojnleke plaots in de maotsjappij zien verovere is geweldeg um mèt te make. 't Geit neet vaan allein. Zeker neet veur us es awwer mer ouch zeker neet veur 't keend zellevers. Toen neet en allewijl zeker neet. Eus riechlijn waor daobij; es ze mer gelökkeg zien en blieve. En dat is tot noe touw gelök. Veurnaomelek door hun zellevers. Wie gelökkeg biste daan es awwer. 't Kin ouch zoevöl aandere goon door de bedreiginge vaan boeten aof...

OPAJAM 2015



En astrein daan 't fles. Door 't gememoreer euver wie 't waor en is - noe mèt häöre maan en twee geweldige kinder - bin iech onderdehand door m'ne veurraad dia's en höb 'n aordeg rijke geselecteerd. Veur aonvaank vaan 't fles weurt ze netuurlek iers touwgezoonge en daan zal wel weer 't ein en aander door m'ne kop sjete, veur- en tegespoed in al die viefteg jaor en zal iech zeker gruuts mètgenete vaan dat momint en hopelek maag iech dat nog hiel lang vashawwe.....

Opajam



October Mariamaond.

's Mörgens um haaf ach d'n trein in op weeg nao Voerendaal. Eder jaor op 10 October organiseert de Octobergróp vaan de Slevrouweparochie 'ne pelgrimstoch vaan Voerendaal nao de Baseliëk in Mestreech.



't Vertrèk vaan d'n eigeleke toch is vaanoet de Maria Sterre der Zie-kapel in Winthagen zoen drei km wijerop.

't Waor 'ne echte Octoberdaag. Fris en heieg. D'n toch löp via veldweeg, bospeedsjes en oetspanninge. Dat lèste um de inwendige mins te sterke um d'n toch te kinne volbringe. In o.a. de kèrk vaan Sjin op Gäöl en Houtem St Gerlach woorte sjoen euverdinkinge ge-hawwe. D'r woord onderweeg vööl gelache mer de serieuze kant vaan deez toch waore de stèltemominte boebij ederein zien eige intentie veurop stèlde. De kleure vaan de blajer aon buim en struuk fleurde d'n killen daag get op. Zoe ouch 't humeur vaan de deilneumers. Altied good gemöts en gemotiveerd genote veer vaan 't Limburgs landsjap. In vreuger jaore moosde die luikes 'n erwt (oongekook!) in hun sokke doen umdat 'n pelgrimstoch ouch 'n boetetoch

waor....

Allewijl weurt volstoon um aoventouw 'n fikse blaor te laote oontstoon oonder de veu. Gelökkeg veel dat allemaol wel mèt dizze kier. Zellevers veul iech miech soms mèt dat gewandel zjus 'n posdouf. Iech verplaots m'ch mèt 't openbaar vervoer nao 'n aander plek op deez eerd en vaan dao-oet loup iech daan trök nao boe iech vaandan koum! 't Einegste versjèl is dat iech neet kin vlege.....en niemes thoës klaor steit um m'ch nao binne te fluite mèt e rammelend bekske doevevoor, m'ne ringk aof te doen en mèt 'n rotvaart nao de plaotseleke kaffee te goon um dee in de doeveklok d'n tied te laote aofdrökke.....

Bij euze trökkoms stoond pestoer Kurrus us al op te wachte. 't Slevrouwe-gebed hingk al in drei taole in de Merodekapel. Studente oet Italië, Spanje, Portugal en oet Mestreech (euer multi cultureel gesproke) hadde gevraog of dat ouch neet meugelek gemaak kós weure in hun taol. Hun verzeuk woort vendaog ingewèlleg. Ze laozen 't gebed in hun eige taol veur. In 't Italiaans, 't Spaons, 't Portugees en jao huur, ouch in 't Mestreechs!

"Wee de jöög heet , heet de touwkoms", zeet e gezègkde. Es dat ech zoe is - en dit waor e veurteike daovaan - daan zit 't mèt de Moder Gaods-veriering in eus stad wel good.

Nao 't gezamelek naopraote en ete vaan sop en e bruudsje woord 'ne geweldegen daag aofgeslote. Opajam



VASTELAOVEND 2015/16

Iech moot 'ns nao d'n hoesarts goon
Vaan November tot Fibberwarie
kin iech neet mie rösteg op mien bein blieve stoon
D'n dokter zag; "Jao huur iech zeen 't good
Geer höb vaan alles en nog get in eur blood".

Sinds kort is dao confetti aon touwgevoog
En 't zaot al vol mèt Vastelaovend
Es m'ne blooddrökmeter teminste neet loog.
Ouch gief dee aon; eur blood zit vol meziek
Meh mins, daomèt biste e haaf jaor de Prins te riek...

Noe iech toch de inhajd vaan de blood bin aon 't mete,
Ouch de Mestreechter Geis zit dao-in
Wat hèt; de bis door dee Geis totaal bezete...
Mezieknote danse in d'n aojers en d'n hart sleit op hol
Wèlste dao vaanaof, gaank daan mer 'ns flink oet d'ne bol!

Ouch d'n dokter kraog, gein rös in mie lief, wat ze ouch doog,
Ze duide, kneep, klopde en zo mie, de drökmeter sloog door
Ze loerde bezörg en iech deeg alles wat ze m'ch vroeg
Toen kraog iech d'n oetslaag; 't zit in eur gene volges miech
Geine arts, krijg dat oets oet eur lief, dink iech



Vastelaovend doorde nog neet zoe lang geleie mer drei
daog
Same mèt de pèlskes, tètèdevaux, friet, hiering en
gebakke vès,
zit 't neet allein in de blood mer ligk 't ouch op d'ne
maog
Iech höb mer ein advies veur 'n ederein mèt die klachte
Drink mèt maote, zingk en spring 't droet, alle daog en
nachte

**Höb geer op 't momint gein 'maote' veur 't viere
vaan Carnaval
Tijdens Vastelaovend vindt geer ze ech everal....!!!**

Opajam



'ne BOUM OPZÉTTE..

De Goodheilegmaan is nog neet oet 't dörp of de stad vertrokke, mèt zien ZWARTE Piete (jeh zeker, **zwarte** piete)) of veer rije d'r weer massaol op oet in d'n oto, oppe fiets of mèt bolderkaar om 'ne veers umgezeegde keersboom te bemachtege. De opdrach vaan de 'vrouw des hoeses' dee de maan



heet mètgekregene is daan ouch; "Lèt op dat ze d'ch geine awwe in d'n voes duie!" Zjus of 'ne boum in z'n voes zouw passe...

'Heer moot tössen 't bijzèttäöfelke, boe-op heer astrein geplasseerd moot weure, en de plefong passe en ruuzelvrij zien'. Neet te kaal, qua aontal tek en naojes, en 'ne óétstekende tóp veur de piek op te zètte.

Nouw, gaank dao mer aonstoon. De maan, dee Sjaak hèt vaan vääre, slentert 't terrein op, boe de buim in alle maote en soorte op hun nuie bestumming stoon te wachte.....

Sjaak, beloert 't z'ch 'ns en sjnap z'ch eine bij d'n tóp, rammelt 'ns flink demèt, um de tek te spreie en te controlere of heer inderdaod neet ruuzelt. Oondertösse sjatte heer de huugde in. Natuurlek 'ne meter vergete um de zjuste huugde te kinne bepaole. E sjoen buimpke, trok heer de conclusie...mer heer ruuselt hei al! De volgende dee heer sjnapde waor te groet en 'ne aandere, ocherm, had minder naojes aon z'n tek daan Sjaak haore op ziene kop! Oeteindelek naam heer 'n beslissing want heer begós z'ch te sjaggernere. Kom op dach 'r Dat gedoe ouch eder jaor. Heer lag z'n käös in d'n oto en ree nao hoes.

De krib opzètte gief miestal gein perbleme . 't Hoes veur Slivvenhier en zien awwers neerzètte veur 'n week of zès, is zoe gepiep. Get gedruug graas op 't zölderke, 'ne boumtak aon de zijkant en kiezel boe de kemeel, de drei keuninge, 'n aontal sjäöpkes en de herders zich tösse op hun gemaak mote veule. D'n ingel woort middels e tuike bove d'n ingaank aon e häökske gehaange. Verleechting drin en veur dat ze weer de zolder op goon stoont 't gehiel weer sjoen debij.

De boum opzètte - lètterlek - is e aander verhaol. Eder jaor obbenuits sneuvelde wel 'n aontal Keersballe. Eder jaor brandde weer minder lemp-kes. Eder jaor hingk 't karpèt vol ingelehaor en in de boum haos niks. Balancerend op e trepke weurt de piek es lèste op d'n tóp ge-spies. Altied e benkelek momint. Dat hèt n.l. in dat alles veur de koumende fiesdaog op z'n plaots steit. Mer veur dat 't zoewied is.....



En zien vrouw bleef mer door enzele euver 't feit dat noe zjus dee Keersbal vaan Ama zaoleger boe ze zoe gruuts op waor, deez kier is kepot gevalle. Al die jaore hiel zuineg op gewees en noe ...pats dat laog 'r, de bal, in sjerne op de grond. De gekleurde veugelkes mèt knieperke veur de bevesteging op 'ne tak,waore al ieder gesneuveld. En mer door blieve vreigele euver 't feit dat 't veureg jaor de lempkes neet mèt zörg waore opgeborge, aandere waore ze noe neet in de war en nog gans. Nein, die zouwe coute que coute in dat vööl te klein duuske mote... En wee had dat gedoon? Jao huur, Sjaak netuurlek. 't Doorde häöm altied vööl te lang 't opzette mer ouch 't opruime. Wie daan ouch ; de opstelling moech gezeen weure.

Zien vrouw trok ziech trök in de keuke. D'r moos ouch nog gegete weure mèt die daog. Wat dat veur zier interessante gesprekke oplieverde wèl iech uuch oonthawwe. Naodat Sjaak veur de veerde kier trök kaom vaan de supermert umdat zien vruike veur de zoevöölste kier e hoegnuudeg ingrediënt waor vergete, leet heer zich in 'ne stool valle. 't Sisse vaan 't fleske wat heer opemaakde en daonao 't klótse vaan 't beer in zien glaas kloont door de kamer.

"Kom vrouw", reep heer, "kom ,zèttich debij. Iech wèl 'ne boum opzette. Mer noe figuurlek. E good gesprek is mèt die daog noets weg!". Heer sjödde e glaas roeje wien in en same lufde ze 't glaas!

'ne Zaolege Keersmes en e veurspodeg Nui jaor boe-in ouch de luikes, die noe in oorlog leve, 't gegund is um rös en vrei te ervare boe ouch op deez eerd.